

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR. S. SUBRAMANIAM  
MENTERI KESIHATAN MALAYSIA**

**PERTANYAAN : BUKAN LISAN  
DARIPADA : YB DATUK WEE JECK  
[TANJUNG PIAI]  
TARIKH :  
SOALAN :**

**YB Datuk Wee Jeck Seng [ Tanjong Piai ] minta MENTERI  
KESIHATAN menyatakan :-**

- (a) penambahbaikan yang dilaksanakan bersama Kementerian lain dalam memastikan struktur bangunan hospital berdaya tahan kepada sebarang kemalangan atau bencana alam serta menjamin keselamatan pekerja dan juga pesakit; dan;
- (b) merombak semula plan kontingensi untuk memindah dan mengendalikan pekerja dan pesakit apabila kemalangan kebakaran atau bencana seperti banjir berlaku.

**Tuan Yang Di Pertua,**

Kementerian Kesihatan Malaysia (KKM) sentiasa memberi keutamaan yang tinggi terhadap aspek keselamatan pesakit, anggota serta pengunjung dalam pembangunan fasiliti kesihatan. Selaras dengan itu,

di dalam pembangunan projek fasiliti kesihatan baru dan naiktaraf fasiliti sedia ada, ketetapan pihak berkuasa tempatan termasuk pihak Bomba dan Penyelamat, Jabatan Keselamatan dan Kesihatan Pekerjaan, dan lain-lain keperluan seperti yang termaktub di dalam *Universal Building By Law* (dengan izin) wajib dipatuhi. Selain daripada itu, perancangan setiap bangunan fasiliti kesihatan juga harus mematuhi piawaian Jabatan Kerja Raya bagi menjamin keselamatan dan keutuhan bangunan. Begitu juga dengan sistem-sistem yang dipasang adalah sistem yang telah mendapat pensijilan dari aspek fungsi dan keselamatan samada mengikut piawaian tempatan mahupun antarabangsa.

**Tuan Yang Di Pertua,**

Pembinaan bangunan-bangunan hospital di bawah Kementerian Kesihatan Malaysia (KKM) adalah mengikut standard yang ditetapkan oleh jabatan-jabatan teknikal. Bagi mempertingkatkan keselamatan dalam penyediaan fasiliti-fasiliti kesihatan khususnya di kawasan yang kerap dilanda bencana alam, KKM juga akan membuat rujukan kepada agensi-agensi yang berkaitan untuk mendapatkan pandangan dan khidmat nasihat tentang penambahbaikan yang perlu dilaksanakan.

Untuk mengatasi isu banjir, KKM telah mengenalpasti hospital tertentu di negeri-negeri yang kerap dilanda banjir dan menaiktaraf sistem kejuruteraan supaya hospital-hospital tersebut "sustainable" semasa bencana banjir. Di samping itu, pihak Jabatan Kerja Raya juga mengambilkira keperluan rekabentuk bencana gempa bumi di Sabah.

**Tuan Yang Di Pertua,**

Semua hospital KKM mempunyai pelan kontigensi bencana termasuk kebakaran atau banjir. Pelan kontigensi ini akan merangkumi proses pemindahan pesakit ke tempat yang lebih selamat dan fasiliti yang boleh meneruskan rawatan pesakit serta apa yang perlu dilakukan jika berlakunya bencana.

Pengarah hospital bertanggungjawab dalam melantik ahli jawatankuasa bencana peringkat hospital. Untuk memastikan pelan kontigensi ini berkesan latihan bencana termasuk kebakaran atau banjir dilakukan secara berkala dengan agensi luar yang lain seperti Bomba dan Penyelamat, Angkatan Pertahanan Awam Malaysia dan agensi berkaitan.

Garis Panduan Pelan Tindakan Insiden Kecemasan dan Bencana Dalaman Bagi Hospital-hospital KKM yang lebih komprehensif telah pun disediakan dan dalam semakan terakhir. Ia dijangka akan diterbitkan pada pertengahan tahun 2017. Garis panduan ini dapat membantu hospital dalam perancangan menghadapi situasi kecemasan dan bencana supaya lebih menyeluruh dan lebih sistematik mengikut empat (4) fasa berikut:

- a) Pencegahan dan mitigasi;
- b) Kesiapsiagaan ;
- c) Respon dan; dan
- d) Pemulihan.

Ini termasuk tatacara pemindahan pekerja serta pesakit apabila berlakunya situasi kecemasan atau bencana.